

惡圓滿富貴於諸所願無不具足乃至究竟
成無上果爾時持世菩薩及諸聖衆聞佛所
說歡喜無量頭面禮足信受奉行

佛說聖持世陀羅尼經

則二

十二

佛說布施經

宋西天三藏法師法天奉 詔譯

如是我聞一時佛在舍衛國祇樹給孤獨園
與大苾芻衆說布施法有三十七種一以信
重心而行布施當得離衆嫉妬人所崇敬二

依時施得三業清淨四時安隱三常行施得
身心適悅無散亂失四親手施得手指纖長
身相端正五爲他施復得他人行大捨施六
依教施心離取相得無爲福七以妙色具施
得身色端嚴衆所愛樂八以上妙香具施恒
得栴檀之香受用供養九以上味施得味中
上味充益支體十如法尊重施得安隱快樂
衆人喜見十一以廣大心施得無量廣大之
福十二以美食施得離饑饉倉庫盈溢十三
以漿飲施得所往之處無諸飢渴十四以衣

服施得上妙衣莊嚴身相十五以住處施得
田宅寬廣樓閣莊嚴十六以卧具施得生貴
族資具光潔十七以象馬車輦施得四禪足
無擁妙用十八以湯藥施得安隱快樂無諸
疾病十九以經法施得宿命等通二十以華
則二果施得七覺支華二十一以華鬘施得脫貪
十三瞋癡垢二十二以香施得離煩惱臭穢二十
三以傘蓋施得法自在二十四以鈴鐸施得
言音美妙二十五以音樂施得梵音深妙二
十六以然燈施得天眼清淨二十七以繒綵

疋帛施得解脫衣服二十八以香水灑如來
塔廟二十九以香水浴如來身三十以香油
塗飾佛像共得三十二相八十種好三十一
以香水施浴眾僧得富貴家生少病安樂三
十二以慈心施得顏貌和悅無諸瞋恨三十
三以悲心施得離殺害三十四以喜心施得
無所畏遠離憂惱三十五以捨心施得離罣
礙證寂滅樂三十六以種種施得種種福三
十七以無住無相心施得無上正等正覺佛
告諸苾芻如是三十七種智者所行微妙施

行汝今受持爾時舍衛國王白佛言世尊我等云何而行布施佛言大王若求勝妙福報而行施時慈心不殺離諸嫉妬正見相應遠於不善堅持禁戒親近善友閉惡趣門開生天路自利利他其心平等若如是施是真布施是大福田得次行施隨自心願獲其報應或以妙色名香珍味軟觸親手布施得衆人尊重眷屬圓滿富貴安樂之報或以飲食布施而得大力或以酥油之燈布施而得天眼或以音樂布施而得天耳或以湯藥布施而

得長壽或以往處布施而得樓閣田園或以法說布施而得甘露佛言大王若以十善行施復得十種報應十善者不殺生不偷盜不婬欲不妄語不綺語不惡口不兩舌不貪不瞋不癡而得命不中天財無散失眷屬清潔則二所言誠諦離諸嫉妬人所喜見親友和睦不十四墮貧賤顏貌端正智慧相應獲報如是佛言大王若以上妙樂飲食供養三寶得五種利益身相端嚴氣力增盛壽命延長快樂安隱成就辯才如是南瞻部洲一切衆生父母妻

子男女眷屬如上布施隨願所求無不圓滿
說此法已皆大歡喜作禮而退

佛說布施經

佛說聖曜母陀羅尼經

宋西天三藏法師法天奉 詔譯

如是我聞一時佛在阿拏迦嚩帝大城爾時
有無數天龍夜叉乾闥婆阿脩羅迦樓羅緊
那羅摩睺羅伽人非人及木星火星金星水

星土星太陰星太陽羅睺計都如是等二十
七曜恭敬圍繞此大金剛三昧莊嚴道場復
有無數千菩薩摩訶薩眾其名曰金剛手菩
薩金剛忿怒菩薩金剛軍菩薩金剛播尼菩
薩金剛主菩薩金剛莊嚴菩薩金剛明菩薩
金剛敷菩薩觀自在菩薩普觀世菩薩吉祥
菩薩蓮華幢菩薩蓮華藏菩薩蓮華目菩薩
慈氏菩薩文殊師利法王子菩薩摩訶薩如
是等諸大菩薩恭敬圍繞佛為說法初善中
善後善其義深遠其語巧妙純一無雜具足

則二

十五